

समे — 12:25

<><><><><>

Kathua Search Operation

कठुआ जिले दे हीरानगर इलाके च सानियाल थाहर आतंकवादिएं दी मजूदगी बारै थोई दी इक टकोहदी सूह दे बाद सुरक्षाबलें आसेआ कल संज्ञां शुरू कीता गेदा तुपाई अभियान अज्ज दुए रोज बी जारी ऐ। इस अभियान दे चलदे पूरे इलाके गी घेरी लैता गेदा ऐ ते इलाके गी खरी चाल्ली खंगालेआ जा करदा ऐ। कल आतंकवादिएं दी मजूदगी बारे सूह थोने पर जम्मू-कश्मीर पुलिस ते फौज दी राइजिंग स्टार कौर नै खतरे गी खत्म करने लेई एह तुपाई अभियान चलाया हा। ताजा जानकारी ते होर ब्योरे गी बलगेआ जा करदा ऐ।

<><><><><>

Poonch Hide Out

सुरक्षाबलें, पुंछ जिले च आतंकवादिएं दे छप्पने आहली इक थाहरै दा पता लाइयै उत्थुआं खरी मती मात्रा च थेआर-असला ते गोला-बरूद बरामद कीता ऐ। साढ़े जिला संवाददाता अनुभव मिसरी नै जानकारी दिती ऐ जे भारती फौज ते जम्मू-कश्मीर पुलिस दे एसओजी समूह आसेआ चलाए गेदे इक सांझे तुपाई अभियान दरान जिले दे सांगला इलाके थमां एह बरामदगी कीती गेई जेहदे च त्रै एके-47 रफलां, 23 मैगजीनां, 922 रौंद गोलियां, 7 हथगोले, 4 आईईडी विस्फोटक, घड़ी आंगर दा इक टाइमर, 19 डेटोनेटर ते 200 ग्राम हेरोइन दे इलावा होर दुआ समेयान शामिल ऐ। ग्रनेड, आईईडी ते डेटोनेटरें गी मगरा बम्ब नकारा करने आहले दस्ते दे माहिरें नकारा करी दिता। इस बरामदगी कन्ने इलाके च केई बड़े आतंकवादी हमले करने दी साजश गी नकाम करी दिता गेदा ऐ।

<><><><><>

MoS Health Care

केन्द्री मंत्री डाक्टर जीतेन्द्र सिंह होरें केन्द्र शासित प्रदेश जम्मू-कश्मीर लेई इक संगठित सेहत सेवा प्रणाली विकसित करने दी जरूरत पर जोर दिता जेहड़ी सरकार आसेआ चलाए संचालित संसाधनं उप्पर निर्भरता घट्ट करी देरै। 'फ्रेंड्स ऑफ जीएमसी जम्मू' आसेआ आयोजित इक समारोह गी संबोधित करदे होई डाक्टर सिंह होरें खित्ते दी सेहत सेवा प्रणाली गी बढ़ावा देने च मेडिकल शोध स्टार्ट-अप्स, निजी सेहत सेवा इदारें ते सार्वजनिक ते निजी सांझ-भ्याली दी समर्थ उप्पर लोऽ पाई। केन्द्री मंत्री होरें सरकार, निजी उद्योग ते शोध इदारें बश्कार मते सहयोग दा आह्वान बी कीता। भारत दे अंतरिक्ष खेत्तर दे निजीकरण दी कामयाबी दा हवाला दिंदे होई उनें सेहत सेवाएं दे खेत्तर च नमिएं काहडें ते रास-पूजी गी बढ़ावा देने लेई इससे चाल्ली दे सुधार कीते जाने दी गुजारिश कीती ऐ।

<><><><><>

Watershed Udhampur

वाटरशेड प्रबंधन लेई केन्द्री संयुक्त सचिव नितिल खड़े होरें उधमपुर जिले दा दौरा लाइयै गुधार पंचैत च प्रधानमंत्री कृषि सिंचाई योजना दे दुए चरण तैहत वाटरशेड जनभागीदारी कप दा उद्घाटन कीता। अपने दौरे दरान संयुक्त सचिव होरें पंचैती राज इदारें, मकामी प्रतिनिधिएं ते होरने सरबंधत घड़ें कन्ने गल्लबात कीती ते उंदिएं चैताएं गी सुनेआ ते उंदे पर पैहल दी बिनाह पर कारवाई दा भरोसा बी दोआया। संयुक्त सचिव होरें उधमपुर च संगठित वाटरशेड प्रबंधन प्रोग्राम कन्ने जुड़ी दी टीम आस्सेआ बड़े असरदार ढंगै नै सेवाएं दी दस्तयाबी ते पानी दी सांभ-संभाल आले जतनें लेई उंदी सराहना कीती। उनें बरखा दे पानी दी सांभ-संभाल आली तकनीकें गी अपनाने लेई लोकें गी जागरूक बनाने दी जरूरत पर जोर पाया।

<><><><><>

TB Day

अज्ज विश्व तपेदिक दिवस यानि टीबी सरबंधी कुल संसारी ध्याड़ा मनाया जा'रदा ऐ। एह ध्याड़ा हर ब'रे 24 मार्च गी मनाया जंदा ऐ ते एहदा मकसद, आलमी सतह दी इस बमारी दे खात्मे आहले जतनें गी तेज करने दे कन्नो-कन्नी लोकें गी एहदे करी सेहत, समाज ते आर्थिक दशा पर पौने आहले माड़े असर बारै जागरूक बनाना बी ऐ। एह ध्याड़ा सन् 18 सौ 82 च डाक्टर रॉबर्ट कोच हुंदे आसेआ टीबी बैक्टीरिया दी खोच दी ब'रेगंड दे चेत्ते च मनाया जंदा ऐ। इस ब'रे इस ध्याड़े दा विशे-सार ऐ — हां! अस टीबी गी खत्म करी सकने आं।

<><><><><><>

PM-MKB

प्रधानमंत्री नरेन्द्र मोदी होर म्हीने च इक बारी प्रसारत होने आले अपने रेडियो कार्यक्रम “मन की बात” इस बारी 30 मार्च गी देश विदेश च रौहने आले श्रोताएं कन्नै बचार सांझे करगन। हर म्हीने दे खीरले ऐतवार बडलै 11 बजे प्रसारत होने आले इस कार्यक्रम दी एह 120मीं किशत होग। कार्यक्रम च शामिल करने लेई लोक अपने बचार ते सुझाह 28 तरीक तगर टोल फ्री नंबर 1800-11-7800 पर भेजी सकदे न। एहदे इलावा लोक अपने बचार My Gov ते नरेन्द्र मोदी ऐप पर बी भेजी सकदे न। एह कार्यक्रम आकाशवाणी ते दूरदर्शन दे समूलचे नेटवर्क दे इलावा न्यूज ऑन एयर मोबाइल ऐप पर बी उपलब्ध रौहग। एहदे कन्नो कन्नी एहदा सिद्धा प्रसारण ए.आई.आर न्यूज, डीडी न्यूज, प्रधानमंत्री हुंदे दफ्तर ते सूचना ते प्रसारण मंत्रालय दे यूट्यूब चैनलें पर बी कीता जाग। आकाशवाणी जम्मू पर मन की बात दे तुरत मगरा एहदा डोगरी च अनुवाद प्रसारत कीता जाग। एहदा डोगरी अनुवाद तुस राती 8 बजे इक बारी परतियै सुनी सकदे ओ।

<><><><><><>

IPL

आईपीएल 2025 दे अज्ज त्रीए रोज विशा,।।पट्टनम दे डॉ. वाई.एस.राजशेखर रेड्डी स्टेडियम च दिल्ली कैपिटल्स दा मकाबला लखनऊ सुपर जायंट्स कन्नै होग। एह मैच संजा साढ़े 7 बजे शुरु होग। कल ऐतवारें दऊं मैच खेड्डे गेदे मैचें च चिन्नेई सुपर किंग्स नै मुंबई इंडियन्स गी 4 विकेटें कन्नै हराई दित्ता। ओहदे शा पैहले हैदराबाद च खेड्डे गेदे इक मैच च राजरूथान रायल्स गी सनराईजर्स हैदराबाद दे हत्थ 44 रंज दी हार दा सामना करना पेआ।

<><><><><><>